



ЖАҢА ЖОБАЛАР – САНДЫҚ ТЕХНОЛОГИЯ МЕН ЖАСАНДЫ ИНТЕЛЛЕКТ ЖЕМІСІ

Президент Қасым-Жомарт Тоқаев Қазақстан Үкіметіне цифрландыруды жан-жақты дамытуды қамтамасыз етуді тапсырып: «Қазақстан цифрландыру мен жасанды интеллектіні жедел дамыту аймағына айналуы тиіс, бұл әлемде сапалы жаңа шынайылықтарды қалыптастырады. Бұл – біздің стратегиялық міндетіміз», – деген еді.

Осы негізгі міндеттер аясында Әділет министрлігі азаматтардың қаржылық және уақыттық шығындарын үнемдей отырып, қызметтердің сапасы мен қолжетімділігін арттыруға бағытталған «Digital Justice» жобалар портфелін іске асыруда. Соның ішінде жасанды интеллектіні қолдану қарастырылған.

Бүгінгі таңда заң көмегінің бірыңғай ақпараттық жүйесі – «E-ZanKomegi» жұмыс істеуде, ол халыққа онлайн режимде білікті заң көмегін ұсынуға және алуға арналған. Бұл жүйе азаматтардың білікті заң көмегіне қолжетімділігін жеңілдетуге бағытталған. Оған 1 949 адвокат пен заң кеңесшісі қатысуда. 2023–2024 жылдары жүйе арқылы 88 738 іс қаралды, ал порталды 6 749 пайдаланушы қолданды.

Қазіргі уақытта «Құқықтық ақпарат қызметі» операторларымен «Бейнеқоңырау» функциясы іске қосылған, бұл азаматтарға тәулік бойы құқықтық кеңес алуға мүмкіндік береді. Сонымен қатар, «Zan Komegi» мобильді қосымшасында құқықтық кеңес беру бойынша жасанды интеллект элементтері бар чат-бот әзірленіп, тестілеуден өтіп, жетілдірілуде. Жасанды интеллектіні іске асыру мақсатында Әділет министрлігі заң қызметтерін көрсетуге арналған платформаларды әзірлеуге бағытталған IT ұйымдардың өкілдерінен (zap bar, irpav, ҚарМУ, ҚазҰТУ, ҚазҰУ және т.б.) жұмыс тобын құрды.

2024 жылдың тамыз айында Әділет министрлігі Республикалық жеке сот орындаушылар палатасымен бірлесіп, «Робот сот орындаушы» пилоттық жобасын іске қосты. «Цифрлық сот орындаушы» келесі артықшылықтарға ие:

Біріншіден, сот орындаушысының қызметіне ақы төлеу мен оған бару шығындары алынып тасталды, себебі барлық әрекеттер автоматты түрде жүзеге асырылады.

БҮГІНГІНІҢ БАС ТАҚЫРЫБЫ

ҚАЗАҚ АҚШАСЫ ҚАЙДА КЕТІП ЖАТЫР?



Еуропа асып жүрген жерлес көп. Мұхиттың ар жағына барып, АҚШ-тан несібе тапқандар аз емес. Кореяға барып кредитін жапқан қазақ жігіттерін де естіп жатамыз. Мұндағы себеп не? Бар мәселені елдегі жұмыссыздыққа жауып қоюға бола ма? Бір қызығы, бізде жұмыс жоқ не айлық төмен десек те, Қазақстанға қыдырып емес, жұмыс істеу үшін келетін өзге шетелдіктер де көп.

(Жалғасы 3-бетте)

(Жалғасы 4-бетте)

IX ҚЫСҚЫ АЗИЯ ОЙЫНДАРЫ

Қытайда өтіп жатқан IX Қысқы Азия ойындарында Қазақстан қазір жалпыкомандалық есепте 4-орында келе жатыр. Бүгінгі таңда жарысқа қатысып жатқан 34 елдің ішінен тек Қытай, Корея, Жапония, Қазақстан, Өзбекстан, КХДР, Тайпей мен Тайланд құрамаларының қоржынында медаль бар.

Қазақстан бұл байрақты бәсекеге бағдарламадағы 11 спорт түрінің 10-ынан 137 спортшы апарған болатын. Атап айтқанда конькимен жүгіруден – 19, шорт-трек, шаңғы жарысы мен керлингтен – он екіден, биатлоннан – 10, тау шаңғы спортынан – 8, фристайлдан – 7, мәнерлеп сырғанаудан – 6, ски-альпинизмнен – 5 және шайбалы хоккейден – 46.

13 ақпанға дейінгі есеп бойынша спортшыларымыз 5 спорт түрі бойынша 3 алтын, 7 күміс, 6 қола жүлдеге ие болды. Атап айтқанда конькимен жүгіруден – 1 күміс, 1 қола; шорт-тректен – 1 алтын, 2 күміс; шаңғы жарысынан – 2 күміс, 2 қола; фристайлдан – 1 алтын, 1 күміс, 2 қола; биатлоннан – 1 ал-

БАЙРАҚТЫ БӘЙГЕДЕГІ ОЛЖАМЫЗ ОРТАЙМАСЫН!



тын, 1 күміс, 1 қола алдык. Бұдан бөлек кеше керлингтен Гонконг спортшыларымен ерлер мен әйелдер арасындағы топтық кезең, ерлер арасында іріктеу кезеңі мен жартылай финал ойындары өтті. Биатлоннан эстафеталық жарыс, шайбалы хоккейден Қытай спортшыларымен әйелдер командасы мен ерлер командасы финалдық ойындар өткізді. Сондай-ақ мәнерлеп сырғанаудан Михаил Шайдоров, Диас Жиренбаев, Софья Самоделькина мен София Фарафоновна еркін бағдарлама бойынша сайысқа түсті. Ал бүгін хоккей мен керлингтен ең соңғы медальдар жиынтығы сарапқа салынады. Яғни, құрама қоржынына спортшыларымыз тағы бірнеше медаль саларына күмәніміз жоқ. Бұл еліміздің IX Қысқы Азия ойындарында жалпыкомандалық есептегі 4-орнын сақтап қалуына толық мүмкіндік береді.

2022 жылы Қытайда өткен Қысқы Олимпиада ойындарында жалпыкомандалық есепте Қытай – 3, Жапония – 12, Корея – 14 орын алған болатын. Сол себепті бұл жарыста Қазақстанның үздік үштікке кіре алмауы кейбір жанкүйерлер айтып жатқандай спорттағы көрсеткішіміздің кері кеткені деу қате тұжырым.

Ерлік ЕРЖАНҰЛЫ,
«Зан газеті»

5-бет



Аралдың ахуалы қайтсе түзелмек?

6-бет



Жас ерекшелігі жауаптылықтан босатпайды

8-бет



Сынбас семсер

